



REPUBLIKA E SHQIPËRISË

**KËSHILLI I LARTË GJYQËSOR**

Nr. \_\_\_\_\_ Prot.

Tiranë, më \_\_\_\_\_.2023

**VENDIM**

**Nr. 381, datë 17.07.2023**

**PËR HAPJEN E PROCEDURËS DHE SHPALLJEN E KËRKESËS PËR  
KANDIDATURA NGA RADHËT E GJYQITARËVE PËR KOMANDIMIN NË  
POZICIONIN E NDIHMËSMAGJISTRATIT NË GJYKATËN KUSHTETUESE**

Këshilli i Lartë Gjyqësor, mbështetur në nenin 79, shkronja “b”, të ligjit nr.115/2016 “Për organet e qeverisjes së sistemit të drejtësisë”, nenet 8, 53, 54, 56, 57 dhe 58 të ligjit nr.96/2016 “Për statusin e gjyqtarëve dhe prokurorëve në Republikën e Shqipërisë” i ndryshuar, si dhe ligjin nr.9367, datë 7.4.2005 “Për parandalimin e konfliktit të interesave në ushtrimin e funksioneve publike” i ndryshuar, me propozim të Komisionit të Zhvillimit të Karrierës,

**VENDOSI:**

**I. Hapjen e procedurës dhe shpalljen e kërkesës për kandidatura**

1. Hapjen e procedurës së komandimit të gjyqtarit në pozicionin e ndihmësmagjistratit Gjykatën Kushtetuese.
2. Shpalljen e kërkesës për kandidatura nga radhët e gjyqtarëve për komandim në Gjykatën Kushtetuese për 3 (tre) pozicione “ndihmësmagjistratit” në Njësinë e Shërbimit Ligjor në Gjykatën Kushtetuese.
3. Afati i paraqitjes së kërkesave për komandim deri në datë 31.07.2023.
4. Kandidati duhet të paraqesë këto dokumente:
  - a) Kërkesa për shprehjen e interesit për të kandiduar për komandimin në pozicionin e ndihmësmagjistratit në Gjykatën Kushtetuese
  - b) Jetëshkrimi, me të dhënat e plota të kontaktit (numër telefoni/e-mail), ku të pasqyrohet, veç të tjerash, çdo e dhënë e mundshme në lidhje me kushtet dhe kriteret preferenciale të komandimit;
  - c) Fotokopje të kartës së identitetit;

- c) Vetëdeklarim për mospasjen masë disiplinore në fuqi, sipas formularit bashkëlidhur këtij vendimi;
  - d) Vetëdeklarim për mosqenien në situatën e papajtueshmërisë ambientale me anëtarët e Gjykatës Kushtetuese, sekretarin e përgjithshëm, apo anëtarët e tjerë të Njësisë së Shërbimit Ligjor në Gjykatën Kushtetuese;
  - dh) Vërtetim nga gjykata/gjykatat për specializimin në fushën administrative, civile ose penale;
  - e) Lista e rezultateve të studimeve dhe karakteristika e Shkollës së Magjistraturës nëse disponohet;
  - ë) Vërtetim nga Shkolla e Magjistraturës për pjesëmarrjen në programin e formimit vazhdues dhe përfshirjen në veprimtaritë trajnuese si trajner, lehtësues, pjesëmarrës;
  - f) certifikatë/dëshmi për gjuhën e huaj;
  - g) tre dokumente ligjore, vendime gjyqësore, artikuj apo botime shkencore në fushën e jurisprudencës ku të pasqyrohet njohja e jurisprudencës;
  - gj) njohja e jurisprudencës së Gjykatës së Strasburgut dhe asaj ndërkombëtare në fushën e të drejtave të njeriut do të konsiderohet avantazh;
  - h) rekomandime si dhe çdo dokument tjetër për aftësitë e komunikimit;
  - i) çdo dokument tjetër që tregon plotësimin nga kandidati të kriterëve të komandimit.
5. Dokumentacioni sipas pikës 4, i këtij vendimi, dorëzohet pranë Zyrës së Protokollit të Këshillit të Lartë Gjyqësor.

## **II. Kohëzgjatja, kriteret dhe procedura e komandimit**

6. Kohëzgjatja e komandimit është 3 (tre) vjet, me të drejtë ripërtëritje.
7. Kohëzgjatja e komandimit mund të përfundojë para afatit:
- a) me kërkesë të gjyqtarit, për shkaqe të justifikuara;
  - b) kur vazhdimi i komandimit bie ndesh me interesat e lartë të gjykatës ku i komanduari ushtron funksionin e gjyqtarit;
  - c) kur ndaj gjyqtarit të komanduar merret masë disiplinore;
  - d) kur gjyqtari i komanduar jep dorëheqjen;
  - e) kur gjyqtari i komanduar largohet nga detyra;
8. Kushtet e komandimit janë:
- a) Komandimi nuk duhet të bjerë ndesh me interesat e lartë të gjykatës ku kandidati ushtron funksionin e gjyqtarit;
  - b) Kandidati nuk duhet të jetë në një pozicion me mandat të kufizuar;
  - c) Kandidati nuk duhet të jetë i komanduar;
  - ç) Kandidati, që ka qenë i komanduar më parë:
    - i) duhet të ketë shërbyer jo më pak se pesë vjet si gjyqtar pas përfundimit të periudhës së mëparshme të komandimit;

- ii) nuk duhet të ketë kaluar kohëzgjatjen maksimale të komandimit prej më shumë se dhjetë vjet gjatë gjithë periudhës së ushtrimit të detyrës;
- d) Kandidati të mos ketë masë disiplinore në fuqi.
- dh) Kandidati të mos jetë në kushtet e papajtueshmërisë ambientale për shkak të lidhjeve të ngushta familjare, me anëtarët e Gjykatës Kushtetuese, sekretarin e përgjithshëm, anëtarët e tjerë të Njësisë së Shërbimit Ligjor, sipas parashikimeve të nenit 8 pika 1 të Ligjit nr.96/2016 “Për statusin e gjyqtarit dhe prokurorit në Republikën e Shqipërisë”.

9. Kriteret preferenciale të komandimit:

- a) Përvoja profesionale minimale prej 1(një) viti dhe vërtetim nga gjykata/gjykatat për specializimin në fushën administrative, civile ose penale;
- b) Njohuri të jurisprudencës së gjykatave vendase dhe ndërkombëtare;
- c) Rezultate të mira në studime, si dhe performanca në programin e formimit fillestar dhe vazhdues në Shkollën e Magjistraturës;
- ç) Njohuri të paktën në një gjuhë të vendeve të Bashkimit Evropian;
- d) Aftësi të mira të shkrimit dhe të arsytimit ligjor;
- dh) Aftësi shumë të mira të komunikimit me shkrim dhe me gojë;
- e) specializimi në fushën kushtetuese dhe të drejtave të njeriut do të konsiderohet avantazh.

10. Për vlerësimin e kushteve të kandidimit, Këshilli i Lartë Gjyqësor mbështetet në dokumentacionin e paraqitur nga kandidati, si dhe në dokumentacionin e dosjes së tij personale të administruar pranë Këshillit.

11. Brenda dy javëve pas përfundimit të afatit të kandidimit, Komisioni i Zhvillimit të Karrierës përgatit një projekt-opinion për çdo kandidat dhe vlerëson nëse komandimi nuk është në përputhje me interesat e lartë të gjykatës ku kandidati ushtron funksionin. Projekt-opinionin për çdo kandidat shqyrtohet nga Këshilli i Lartë Gjyqësor jo më vonë se një javë pas njoftimit të Kryetarit të Këshillit për përgatitjen e tyre. Opinionet e miratuara nga Këshilli publikohen në faqen zyrtare të tij. Këshilli vendos përjashtimin e kandidatit nga komandimi kur komandimi nuk është në përputhje me interesat e lartë të gjykatës ku ai ushtron funksionin ose kur verifikohet që kandidati nuk plotëson ndonjë prej kushteve të tjera të komandimit.

12. Këshilli i Lartë Gjyqësor, i përcjell menjëherë për vlerësim Gjykatës Kushtetuese emrat e kandidatëve që plotësojnë kushtet e komandimit për pozicionin e ndihmësmagjistratit, dokumentacionin e paraqitur nga ata në lidhje me kriteret preferenciale të komandimit, si dhe të dhënat mbi përvojën profesionale të tyre.

13. Gjykata Kushtetuese vlerëson aplikimet e kandidatëve dhe i kërkon Këshillit të Lartë Gjyqësor komandimin e magjistratit që ka përzgjedhur.

14. Brenda dy javëve nga marrja e kërkesës, Këshilli i Lartë Gjyqësor vendos për komandimin në pozicionin e ndihmësmagjistratit, të kandidatit të përzgjedhur nga Gjykata Kushtetuese.
15. Nëse asnjë prej kandidatëve nuk plotëson kushtet e komandimit ose kur asnjë prej tyre nuk përzgjidhet nga Gjykata Kushtetuese, pas njoftimit dhe mbi kërkesën e kësaj të fundit, Këshilli i Lartë Gjyqësor mund të rihap procedurën e komandimit të gjyqtarit në pozicionin e ndihmësmagjistratit në Gjykatën Kushtetuese.

Ky vendim hyn në fuqi menjëherë dhe botohet në faqen zyrtare të internetit të Këshillit të Lartë Gjyqësor.

## **PËR KËSHILLIN E LARTË GJYQËSOR**

### **VETËDEKLARIM PËR MASA DISIPLINORE**

Unë gjyqtari/ja \_\_\_\_\_ (*emër, atësia, mbiemri*), në cilësinë e kandidatit në procedurën e komandimit në pozicionin e ndihmësmagjistratit në Gjykatën Kushtetuese përkundrejt përgjegjësisë ligjore,

**DEKLAROJ SE:**

**Nuk kam masë disiplinore në fuqi.**

**Lëshuar më \_\_\_\_\_.\_\_\_\_.2023**

**DEKLARUESI**

---

*(Emri, atësia, mbiemri)*  
*(Nënshkrimi)*

**VETËDEKLARIM**  
**PËR**  
**SITUATËN E PAPAJTUESHMËRISË AMBIENTALE**

Unë gjyqtari/ja \_\_\_\_\_ (*emër, atësia, mbiemri*), në cilësinë e kandidatit në procedurën e komandimit në pozicionin e ndihmësmagjistratit në Gjykatën Kushtetuese, në përmbushje të detyrimit të përcaktuar në pikën 5, të nenit 8, të Ligjit nr. 96/2016 “Për statusin e gjyqtarëve dhe prokurorëve në Republikën e Shqipërisë”, i ndryshuar, përkundrejt përgjegjësisë ligjore,

**DEKLAROJ SE:**

**Nuk do të ndodhem në situatën e papajtueshmërisë ambientale** sipas shkronjës “a”, pika 3, të nenit 8, të Ligjit nr. 96/2016 “Për statusin e gjyqtarëve dhe prokurorëve në Republikën e Shqipërisë”, i ndryshuar.

Lëshuar më \_\_\_\_\_.\_\_\_\_.2023

**DEKLARUESI**

---

*(Emri, atësia, mbiemri)*  
*(Nënshkrimi)*